



KERAJAAN SERI PADUKA BAGINDA
MALAYSIA

PEKELILING PERKHIDMATAN BIL. 6 TAHUN 1982

PINDAAN KEPADA PEKELILING PERKHIDMATAN
BIL. 9 TAHUN 1980

Untuk melengkapkan peraturan mengenai elaun-elaun dan pemberian kemudahan berikutan dengan pemangkuan dan kenaikan pangkat, maka Pekeliling Perkhidmatan Bil. 9 Tahun 1980 adalah, dengan ini, dipinda seperti berikut:

- (i) Potong semua sekali *ayat akhir* dalam perenggan 48 (i).
- (ii) Masukkan kepala tajuk dan perenggan-perenggan yang baru 49 dan 50 seperti berikut selepas perenggan 48:

“Tarikh Kuatkuasa Pembayaran Elaun dan Pemberian Kemudahan Kepada Pegawai-pegawai Yang Dinaikkan Pangkat atau Memangku Mulai Daripada Satu Tarikh Yang Dikebelakangkan.

49. Jika tarikh kuatkuasa seseorang pegawai yang memangku atau terus dinaikkan pangkat ke jawatan yang lebih tinggi dikebelakangkan maka ia hendaklah dibayar tunggakan elaun memangku atau gaji hakikinya mulai daripada tarikh kuatkuasa pemangkuan atau kenaikan pangkatnya itu. Selain daripada itu, pegawai yang berkenaan juga hendaklah dibayar apa-apa elaun dan diberi apa-apa kemudahan menurut jenis dan kadar yang layak diterima oleh pemegang hakiki jawatan yang lebih tinggi itu mulai daripada tarikh kuatkuasa pemangkuan atau kenaikan pangkat itu, atau daripada 1hb Julai, 1980 jika pemangkuan atau kenaikan pangkat itu diluluskan sebelum tarikh tersebut, termasuklah:

- (a) Elaun Khidmat Awam;
- (b) Elaun Keraian;
- (c) Bayaran Bantuan Menyenggara Rumah;
- (d) Bayaran Bantuan Gaji Drebar;
- (e) Bayaran Bantuan Gaji Pekerja Rumah;
- (f) Pinjaman Perumahan:

Sekiranya dalam tempoh mulai daripada tarikh kuatkuasa pemangkuan atau kenaikan pangkat itu sehingga pengumumannya pegawai berkenaan *telah*

diluluskan pinjaman perumahan kerana membeli harta yang dinilai oleh Kerajaan lebih tinggi daripada maksima pinjaman yang dilayaki oleh jawatan hakikinya sebelum tarikh kuatkuasa pemangkuan atau kenaikan pangkatnya itu, maka tambahan boleh diluluskan kepada pinjaman perumahannya itu sehingga jumlahnya menyamai nilai harta yang diberi mengikut penilaian Kerajaan yang tersebut atau maksima pinjaman baru, mengikut mana yang lebih rendah, tetapi tidak boleh melebihi maksima pinjaman yang dilayaki bagi jawatan kenaikan pangkat itu.

(g) Pinjaman Kenderaan:

Sekiranya pegawai yang diluluskan pemangkuan atau kenaikan pangkat itu *telah* diluluskan pinjaman kenderaan kerana membeli kenderaan dalam tempoh mulai daripada tarikh kuatkuasa pemangkuan atau kenaikan pangkatnya sehingga tarikh pengumuman-nya tetapi harga kenderaan yang telah dibeli itu, bagi kenderaan yang baru, atau nilainya mengikut penilaian Kerajaan, bagi kereta yang sudah terpakai, lebih tinggi daripada jumlah maksima pinjaman yang dilayakinya berasaskan jawatan hakiki yang disandangnya sebelum pemangkuan atau kenaikan pangkatnya itu diumumkan, maka tambahan hendaklah diberi kepada pinjaman kenderaan supaya jumlah pinjaman itu sama dengan harga atau nilai kenderaan yang telah dibeli oleh pegawai itu tetapi jumlah pinjaman itu tidak boleh lebih daripada maksima pinjaman yang dilayaki oleh jawatan kenaikan pangkat itu.

(h) Bayaran Bantuan Sewa Rumah:

Sekiranya seseorang pegawai sebelum memangku atau dinaikkan pangkat ke jawatan yang lebih tinggi tinggal di rumah Kerajaan dengan membayar sewa rumah tetapi dengan pemangkuan atau kenaikan pangkat itu layak tinggal di rumah Kerajaan dengan percuma, maka pegawai itu hendaklah dibayar balik, mulai 1hb Julai, 1980, sewa rumah yang telah dibayar olehnya, atau mulai tarikh kuatkuasa pemangkuan atau kenaikan pangkat itu sekiranya tarikh itu terkemudian daripada 1hb Julai, 1980. Begitu juga sekiranya seseorang pegawai sebelum memangku atau dinaikkan pangkat ke jawatan yang lebih tinggi telahpun layak menerima Bayaran Bantuan Sewa Rumah dan setelah memangku atau dinaikkan pangkat ke jawatan yang lebih tinggi itu layak menerima Bayaran Bantuan Sewa Rumah atas kadar yang lebih tinggi maka ia hendaklah dibayar perbezaan di antara kadar Bayaran Bantuan Sewa Rumah bagi jawatan hakiki atau jawatan lamanya dengan kadar Bayaran Bantuan Sewa Rumah bagi jawatan yang dipangku atau jawatan kenaikan

pangkatnya mulai 1hb Julai 1980 atau mulai daripada tarikh kuatkuasa pemangkuan atau kenaikan pangkatnya itu, sekiranya tarikh itu terkemudian daripada 1hb Julai, 1980.”

“50. Walau bagaimanapun, elaun-elaun dan kemudahan-kemudahan yang berikut hendaklah dinikmati hanya mulai daripada tarikh surat pengumuman mengenai keputusan kenaikan pangkat atau pemangkuan itu dibuat oleh kuasa-kuasa yang tertentu :

- (a) Elaun-elaun yang merupakan gantian perbelanjaan yang diperuntukkan di dalam Perintah Am Bab ‘B’ seperti Elaun Makan, Elaun Lojing, Bayaran Sewa Hotel, Elaun Perjalanan Kenderaan, Elaun Berkursus dan lain-lain elaun yang diluluskan oleh Kerajaan dari masa ke semasa;
 - (b) Kelayakan Wad;
 - (c) Kelayakan Kelas Tempat Duduk Kapal terbang atau Keretapi;
 - (d) Kelas Rumah Kerajaan;
 - (e) Lawatan Tambang Percuma;
 - (f) Peruntukan Kereta Rasmi;
 - (g) Bekalan Letrik dan Air Percuma.”
- (iii) Nomborkan semula perenggan-perenggan 49, 50, 51, 52 dan 53 yang ada sekarang supaya masing-masing menjadi perenggan-perenggan 51, 52, 53, 54 dan 55.
- (iv) Gantikan angka “48” dalam perenggan 51 dengan angka “50”.
- (v) Tambah perkataan-perkataan yang berikut di akhir senarai arahan-arahan yang dibatalkan di perenggan 54 (ii) :

“Surat Pekeliling Perkhidmatan Bil. 23 Tahun 1972”.

TAN SRI OSMAN S. CASSIM,
*Ketua Pengarah Perkhidmatan Awam,
Malaysia*

JABATAN PERKHIDMATAN AWAM,
MALAYSIA,
KUALA LUMPUR.

10hb Jun 1982

Jabatan Perkhidmatan Awam Malaysia,
Tingkat 7, 9-14 & 16 Bangunan UMBC, Jalan Sulaiman, Kuala Lumpur 01-33
Telefon: 208144 Alamat Telegraf “Festoff Kuala Lumpur”

JABATAN PERCETAKAN NEGARA, KUALA LUMPUR